

Náttúrustofa Vestfjarða

**Fornleifakönnun vegna Vestfjarðavegar
frá Skálmarfirði til Kollafjarðar**

Skýrsla unnin fyrir Vegagerðina
vegna frummats á umhverfisáhrifum vegagerðar

Ragnar Edvardsson
Fornleifastofnun Íslands

Umsjón
Þorleifur Eiríksson
Náttúrustofa Vestfjarða

Mars 2001

Fornleifakönnun vegna Vestfjarðavegar frá Skálmarfirði til Kollafjarðar

Skýrsla unnin fyrir Vegagerðina
vegna frummats á umhverfisáhrifum vegagerðar.

Ragnar Edvardsson
Fornleifastofnun Íslands

Umsjón
Þorleifur Eiríksson
Náttúrustofa Vestfjarða

Mars 2001

Efnisyfirlit	bls.
Inngangur	3
Um fornleifaskráningu	3
Yfirlit yfir byggðarsögu	4
Fornleifakönnun	5
Niðurstöður	6
Heimildaskrá	6
Myndir	7
Kort	11

Inngangur

Í þessari skýrslu birtast niðurstöður fornleifakönnunar á tilvonandi vegstæði frá Skálmarfirði að bænum Múla í Kollafirði. Fornleifakönnunin fór fram í lok ágúst 1999 að ósk Kristjáns Kristjánssonar hjá Vegagerðinni á Ísafirði, var vegstæðið eingöngu kannað á vettvangi og var aðeins minniháttar heimildakönnun framkvæmd á þeim bæjum sem eru á svæðinu.

Samkvæmt heimildum voru áður sjö bæjur í byggð á svæðinu, Fornasel, Vattarnes, Skálmardalur, Illugastaðir, Klettur, Fjarðarhorn og Múli. Í dag er einungis búið á Kletti og Múla.

Um fornleifaskráningu

Á síðustu árum hefur Fornleifastofnun Íslands unnið með og þróað aðferðir við fornleifaskráningu. Stofnunin hefur nú undir höndum stærsta gagnagrunn um menningarminjar á Íslandi. Fornleifaskráning hefur fyrst og fremst verið unnin fyrir og í samvinnu við sveitarfélög og stofnanir þeirra.

Fornleifaskráningu er skipt í þrjú stig og eru þar höfð til viðmiðunar hin þrjú stig skipulagsvinnu, svæðis-, aðal-, og deiliskipulag. Svæðisskráning felst í söfnun heimilda um fornleifar á tilteknu svæði og öflun annarra gagna sem geta gefið vísbendingar um menningarminjar. Markmið svæðisskráningar er að gefa heildaryfirlit um ástand og eðli menningarminja á stóru svæði, t.d. í heilu sveitarfélagi, sýslu eða héraði. Með svæðisskráningu er reynt að finna og skilgreina svæði og staði sem eru sérstaklega athyglisverðir eða í sérstakri hættu. Svæðisskráning erundirbúningur undir aðalskráningu fornleifa. Aðalskráning felst í vettvangsvinnu og miðar að því að staðsetja og kortleggja einstaka minjastaði og lýsa þeim á skipulegan hátt. Deiliskráning er síðan nákvæmari úttekt á litlu svæði og er unnin samhliða áætlunargerð um ráðstöfun jarðnæðis.

Í 18. grein þjóðminjalaga kemur fram að skylt sé “að fornleifaskráning fari fram á skipulagsskyldum svæðum áður en gengið er frá skipulagi eða endurskoðun þess...” Stærstu hagsmunir sveitarfélaga liggja í því að koma í veg fyrir að fornminjar verði fyrir skemmdum við ýmiss konar framkvæmdir. Í 21. grein þjóðminjalaga kemur fram að þeim sem standa fyrir meiriháttar framkvæmdum beri að greiða fyrir rannsóknir á fornminjum sem í ljós koma við jarðrask á þeirra vegum. Þetta atriði eitt og sér rennir styrkum stoðum undir nauðsyn fornleifaskráningar því með skipulegi skráningu er hægt að finna og staðsetja fornminjar áður en kemur að jarðraski og þar með spara verulegar fjárhæðir. Fyrir utan þetta atriði eykst nú skilingur á möguleikum á að nýta upplýsingar um menningarminjar í ferðaþjónustu, en til þess að það sé hægt verða að vera til heildstæðar upplýsingar um ástand fornleifa og staðsetningu.

Í 16. grein þjóðminjalaga er eftirfarandi skilgreining á því hvers konar minjar teljast til fornleifa, og er hún lögð til grundvallar í fornleifaskráningu:

- a. byggðarleifar, bæjarstæði og bæjarleifar ásamt tilheyrandi mannvirkjum, húsaleifar hvers kyns, svo sem kirkna, bænhúsa, klaustra og búða, leifar af verbúðum, naustum, verslunarstöðvum og byggðaleifar í hellum og skútum;
- b. vinnustaðir þar sem aflað var fanga, svo sem leifar af seljum, verstöðvum, bólum, mógröfum, kolagröfum og rauðablæstri;
- c. gömul tún-akurgerði, áveitumannvirki og leifar eftir veiðar til sjávar og sveita;
- d. gamlir vegir, stíflur, brýr, vatnavöð, varir, hafnir og bátalægi, slippir, ferjustaðir, kláfar, vörður, vitar og önnur vega- og siglingamerki ásamt kennileitum þeirra;
- e. virki og skansar og önnur varnarmannvirki;
- f. gamlir þingstaðir, meintir hörgar, hof og vé, brunnar, uppsprettur, álagablettir og aðrir staðir og kennileiti sem tengjast siðum, venjum, þjóðtrú eða þjóðsagnahefð;
- g. áletranir, myndir eða önnur verksummerki af manna völdum í hellum eða skútum, á klettum, klöppum eða jarðföstum steinum;
- h. haugar, dysjar og aðrir greftrunarstaðir úr heiðnum eða kristnum sið;
- i. skipsflök eða hlutar úr þeim;

Að jafnaði skal telja minjar 100 ára og eldri til fornleifa.

Á þessu sést að fornleifar eru ekki einungis forn mannvirki heldur einnig staðir sem tengjast merkum atburðum, þjóðsögum og þjóðháttum. Við fornleifaskráningu er þessari viðu skilgreiningu fylgt og staðir eins og orrustustaðir skráðir og einnig staðir sem tengjast sögu og bókmenntum Íslands. Dæmi um slikt eru staðir þar sem draugum var komið fyrir eða þar sem þeir eiga að hafa búið.

Þótt miðað sé við mannvirkjaleifar sem eru 100 ára eða eldri er í raun stuðst við víðari skilgreiningu við skráninguna. Allar byggingar úr torfi og grjóti eru skráðar sem og önnur mannvirki sem bera vitni um horfið verklag eða tækni. Þar með geta talist elstu steypubyggingar, byggingar úr blönduðu efni og mannvirki eins og heimarafstöðvar, sundlaugar, fiskplön, áveituskurðir, minjar sem tengjast seinni heimsstyrjöldinni, veru setuliðsins og framkvæmdum á vegum þess.

Yfirlit yfir byggðarsögu

Samkvæmt Jarðatali Johnsen frá 1847 voru tólf jarðir í byggð á svæðinu á milli Vattarfjarðar og Kollafjarðar. Þessar jarðir voru Múli (við Kollafjörð), Fjarðarhorn, Klettur, Seljaland, Bær á Bæjarnesi, Kirkjuból, Selsker, Illugastaðir, Skálmardalur og Vattarnes. Af þessum tólf eru einungis sex sem eru við eða nálægt vegstæðinu: Múli við Kollafjörð, Fjarðarhorn, Klettur, Illugastaðir, Skálmardalur og Vattarnes.

Jarðirnar koma ekki fyrir í Landnámabók en elstu heimildir um byggð á svæðinu eru frá 13. og 14. öld. Jarðirnar koma allar fyrir í jarðabók Á.M. frá 1706 og eru þær flestar litlar, 6 – 16 hundruð að dýrleika. Í dag eru þær flestar komnar í eyði og eingöngu er búskapur á Kletti og Múla.

Fornleifakönnun

Fornleifakönnunin hófst í Vattarfirði og var svæðið kannað frá vestri til austurs. Engar fornleifar sáust við vegstæðið frá Kerlingarfirði og að Vattarnesi. Tvær tillögur um vegstæði við Vattanes eru lagðar til. Sú fyrri leggur til að vegstæðið verði lengra frá sjó en núverandi vegstæði og mun það því fara yfir bæjarstæði Vattarness. Sú síðari er að vegurinn fylgi gamla vegstæðinu (kort2). Á bæjarstæðinu eru margar rústir vel sýnilegar og er ljóst að bæjarstæðið er í verulegri hættu vegna vegstæðisins. Norðvestur af bæjarstæðinu er grjóthlaðin rétt og er vegurinn alveg við hana. Samkvæmt Kristjáni Kristjánssyni hjá Vegagerðinni hefur þessari tillögu nú verið breytt og vegurinn fylgja núverandi vegstæði.

Einnig eru tvær hugmyndir um vegalaugningu um Skálmarfjörð. Önnur hugmyndin er um veg fyrir fjarðarbotninn, framhjá bænum Skálmardal. Hin hugmyndin er vegir þvert yfir fjörðinn framhjá bænum Illugastöðum (kort 2). Leiðin fyrir fjarðarbotninn mun ekki raska neinum fornminjum við bæinn Skálmardal.

Þrjár vörður eru við vegstæðið, ein í fjarðarbotninum austanmegin og tvær vestanmegin en þær verða ekki fyrir raski ef fylgt verður gamla vegstæðinu. Hin leiðin yfir Skálmarfjörð fer of nálegt bæjarstæði Illuguastaða og er líklegt að það muni raska fornminjum. Einnig er áætlað að taka fyllingu í fjörunni fyrir neðan túnið og er hætta á að slík framkvæmd raski fornminjum. Samkvæmt Kristjáni Kristjánssyni hjá Vegagerðinni verður Skálmarfjörðurinn ekki þveraður.

Á hálsinum, milli Skálmarfjarðar og Kollafjarðar er vörðuð, leið. Sú leið er norðar í dalnum og liggur í boga yfir heiðina í Kollafjörðinn (sjá kort). Eingöngu nyrsti hluti gömlu leiðarinnar liggur við vegstæðið. Nokkrar vörður fylgja núverandi þjóðvegi þar sem vegurinn liggur upp hálsinn, Illugastaða megin. Þessar vörður tilheyra ekki elstu leiðinni yfir hálsinn og er líklegt að þær hafi verið hlaðnar á síðustu öld og tilheyri síðari tíma viðbót. Þær vörður sem tilheyra elstu þjóðleiðinni yfir Klettsháls eru ekki í hættu vegna vegagerðarinnar. Einungis ein varða (mynd 5) tilheyrir gamalli þjóðleið og er hún ekki í hættu.

Engar rústir sáust á leiðinni framhjá bænum Kletti og er bæjarstæðið ekki í hættu. Tvær rústir eru í fjarðarbotninum vestanmegin og eru þær í nokkurri hættu, þar sem að þær eru innan 20 m. radius frá vegstæðinu. Þar er nauðsynlegt að fara með gát við vegaframkvæmdir. Í Kollafirði á vegurinn annaðhvort að fylgja gamla vegstæðinu um fjarðarbotninn framhjá bænum Fjarðarhorni eða að fara sunnar yfir fjarðarbotninn. Ef vegurinn fylgir gamla vegstæðinu eru engar fornminjar í hættu en nýja veglinan sem liggur yfir fjörðinn mun raska tveim fornminjum sem eru í fjörunni austanmegin í Kollafirði (Kort 4).

Niðurstöður

Fornminjum stafar hætta af vegaframkvæmdunum á nokkrum stöum. Í Vattarfirði og Skálmarfirði eru það bæjarstæði Vattarness og Illugastaða sem eru í mestri hættu. Við Vattarnes er æskilegt að vegurinn fylgi núverandi veglinu til að koma í veg fyrir að bæjarstæðið sjálft verði fyrir raski.

Ef vegurinn er lagður þvert yfir Skálmarfjörð er hætta á að fornminjar verði fyrir raski við Illugastaði. Því er betra að vegurinn fari um fjarðarbotninn og fylgi gömlu veglinunni eins og kostur er.

Á heiðinni milli Skálmarfjarðar og Kollafjarðar eru flestar varðanna fyrir utan veglinuna og er nauðsynlegt að gæta ýtrustu varúðar á því svæði. Myndir 1-7 sýna þær vörður sem helst eru í hættu en líklegt er að þær sé flestar frá 20.öld.

Í Kollafirði eru það einungis tveir staðir austanmegin í í firðinum sem eru í beinni hættu vegna framkvæmdanna og er æskilegt að vegurinn fylgi gamla vegstæðinu á því svæði (kort 3)

Nauðsynlegt er að taka fram að ýmsar minjar, eru nálægt vegstæðinu en ekki í beinni hættu. Sérstaklega við gamla vegstæðið þar sem að rústir eru rétt við veginn. Á þeim svæðum er nauðsynlegt að gæta ýtrustu varúðar við vegaframkvæmdir.

Heimildaskrá

- Árni Magnússon, Páll Vídalín: *Jarðabók*, VI bindi. Kaupmannahöfn 1940.
Diplomatarium Islandicum, I – XVI, Kaupmannahöfn/Reykjavík 1857 – 1972.
Íslendingasögur, I, Reykjavík 1953
J. Johnsen: *Jarðatal á Íslandi*, Kaupmannahöfn 1847.



Mynd 1. Varða 1 á hjallanum rétt ofan Gunnsteins.



Mynd 2. Varðan er í kanti gamla vegarins.



Mynd 3. Varða 3.



Mynd 4. Varða 4.




Mynd 5. Varða 5 þessi varða er rétt ofan hinnar fornú Eyvindargötu og hér mætast fornar gönguleiðir, bæði úr Kolla-firði og Kvígindisfirði.




Mynd 6. Varða 6 rétt ofan vegar utan Skálmardalshússins.



Mynd 7. Varða 7 rétt ofan, nokkru utar en varða 6. Varðan er hlaðin ofan á klappardrang.




Mynd 8. Varða 8 æskilegt er að þessi varða víki.



Kort 1. Hættusvæði í kringum bæjarstæðin.

Vestfjarðavegur




- Tillögur
- Eldri leið yfir Klettsháls
- Þjóðvegur
- Hætta á formminjum
- Hæðarlínur
- Bærjarstæði

Kortið er unnið eftir loftljósmyndum fra Vegagerðinni og kortum frá Landmælingum Íslands.



Kort 2. Vestfjarðavegur frá Vattanesi að Múla. Gamla vegstæðið og tillögur um breytingar.

Vestfjarðavegur



Kort 3. Þetta kort sýnir staðsetningu varðanna sem eru í mestri hættu.

Vestfjarðavegur í Kollafirði

